

Paur kute Korxikam me jamã pi'ôk no'ôk ne ja.

Me'õ nhidjibê Epapraj ne arým Paurkôt Jejuo aminhõ. Ne kam akubyn õ pykabê Korximã tẽn kam memã ar Jeju'ã ujarênh ba. Nhym mekam kwý arým tu amim Jeju markumrêx ne kôt aben pydji. Nhym kam Epapraj Paur'ýr tẽn bõx. Mekbê ijê djâkam Paur ãm rá'ã nhym Epapraj 'ýr bõx ne kam õ pykabê Korxikam ar ja Paurmã ar arênho nhỹ. Nhym kam tu Paur kute ar omũnh kêt kam tu kum ar kĩnhkumrêx. Kute ar omũnhmãn pràbê tu kum ar kĩnhkumrêx ne kam arkum pi'ôk no'ôk ne. Nhym bep Korxikam me kwý ne me Metĩndjwýnh kabên kupa'ã ar memã arênho ba. Nãm me 'êx ne we,

—Me mykà rênhbit ne Metĩndjwýnh kum me kĩnh ne meo kra. Ne ajte memã 'êx ne we,

—Metĩndjwýnh kadjy mrãnh djwýnhmã akabên. Djãm abênjadjwýr got ga katàt Metĩndjwýnhmã ami-jarê? Dja ga kadjy mrãnh djwýnh kumrêxmã ami-jarê gê amũ kum ajarê, ane. Kati, nãm me memã 'êx. Nhym me kute mýjja krênmã nhym me mebê mýjja pyman memã kum,

—Ê, kwãrĩk wãnh ja krên kêt, ane.

Kam ne Paur arkum,

—Kwãrĩk wãnh atemã me kabênwã mar kêt. Nhym bep Kritu ne kabên mexkumrêx. Tãm gêdja gar 'ãno djan kabên ma. Kritu ajbit kute me utàr. Kwãrĩk wãnh kadjy mrãnh djwýnhmã akabênwã wãm nõ. Kritu pydji ne kute me utàr. Kwãrĩk wãnh

atemã 'õ jabej kêt. Ajbit ne Metĩndjwỳnh djwỳnhĩ ne mỳjja kunĩ 'y ne kute me utàr. Nà, nhym Jeju Bãmbê Metĩndjwỳnh tãm ne amiwỳr me bajo bõx. Kra kukwakam amiwỳr me bajo bõx ne me bajo õbikwakumrẽx. Nãm ã Paur arkum pi'õk no'õko anen kam arkum ano. Tãm ne ja.

1-2 Ba ibê Paurmẽ gwaj bakamy Ximoximẽ ne bar ar amã pi'õk no'õk ne. Ibê Paur, Metĩndjwỳnh kute ijã amim karõ nhym Jeju Kritu kute ijanor ba itẽm, ba, ba ne ba ar amã pi'õk no'õk ne. Krĩraxe Korkikam Kritu nhõ me ja, õ me mextire ja, ar aje amim Kritu markumrẽx ne 'ã angrà tỳx ne Kritukõt aje abeno akamyja, ar amã ne ba pi'õk no'õk ne.

Gê Metĩndjwỳnh ar ajo djuw mex, Metĩndjwỳnhbê me Babãmmẽ krabê Bẽnjadjwỳr Jeju Kritu ar ukaprĩkõt ar ajo djuw mex ne ar ar ajo ba, ne ar amã umar mex jarẽ gar adjumar mex ne ar aba.

Paur kute Metĩndjwỳnhmã arkam amikĩnh jarẽh.

³ Bar ije Metĩndjwỳnhmã ar ajo idjà'wỳrkõt mã kum ar akam amikĩnh jarẽ. Bãmbê Metĩndjwỳnh, gwaj banhõ Bẽnjadjwỳr Jeju Kritu Bãmbê Metĩndjwỳnh kumã ne bar amikĩnh jarẽ.

⁴ Mỳkam ne bar kum ar akam ikĩnh jarẽ? Bir, nã gãm ar tu amim Kritu Jeju markumrẽx ne kam kõt amã me jadjwỳ jabêkumrẽx, amã õ me ja, õ me mextire ja jabêkumrẽx bar arỳm kuman kam ikĩnhkumrẽx.

⁵ Be, kute ar amã mỳjja mex djir ne gar kam ama. Metĩndjwỳnh kute kàjkwakam ar amã mỳjja mex djir ne katàt ar amã arẽnh, mỳjja mex tãm ne

gar aman tu amim kamnhĩxkumrêx ne kam kam ama. Ar aje mỳjja mexkam amakkam ne gar tu amim Jeju markumrêx ne kam kôt amã õ me ja jabêkumrêx. Bir be, nã gãm ar Jeju'ã ujarênh nyja man tu amim kamnhĩxkumrêx. Jeju'ã ujarênhja ne katàt nõ. Kabên punu kêt. Kabên 'êxnhĩ kêt. Kam ne katàt nõ.

⁶⁻⁷ Be, Jeju'ã ujarênh ny arỳm wākam ar awỳr bôxwã pumũ. Nãm me pyka kunĩkôt Jeju'ã ujarênhõ ajmà. Arỳm ne me o ajmà nhym me ar akudjwa arỳm kuman arỳm kum mỳjja mexbit kĩnh ne ar o ba. Nãm me mỳjja mexbit ma. Be, nãm ã wākamdjwỳ ar amã arênhõ ane. Gar arỳm ã mỳjja mexbit maro ane. Krax kurũm ar aje mar totokbê ne gar ã amijo ane.

Epapraj ne ar amã Metĩndjwỳnh jarênhõ tẽ gar arỳm kôt maro tẽ. Nà, Epapraj ne ar amã Metĩndjwỳnh djukaprĩ jarẽ. Metĩndjwỳnh ne ukaprĩkôt ar ajo djuw mex. Nhym Epapraj ar amã ukaprĩ jarẽ gar kam arỳm tu amim markumrêx. Nã gãm ar anhõkre kadjwỳnhbê,

—Nà, mrãmri ne arỳm Metĩndjwỳnh djukaprĩkumrêx ne ja, ane. Nà, Epapraj ne ar amã arẽ gar maro tẽ. Ar imã Epapraj kĩ:nhkumrêx. Nãm ar ikôt àpênh ar ba. Mrãmri Křitu nhõ àpênhkumrêx ne kum àpênh ar ba ne kute kanga kêtumrêx. Nãm wãm ar akam bôx ne ar ikôpdji'ã ar àpênh ba.

⁸ Be, Epapraj, ta ne ar imã ar amex jarên ar imã,

—Ota arkum aben jabêkumrêx. Metĩndjwỳnh Karõ ne abenã arkum karõ nhym ar arỳm kum aben jabêkumrêx, ane. Nãm ã ar imã ar ajarênhõ ane.

⁹ Bir be, kam ne bar mã kum ar ajo a'uw. Epa-praj kute ar ajarēnh bar ije mar totokbê ne bar Metīndjwýnhmã ar ajo idjà'wýr ry typydji. Nã bãm ar kum ar ajã,

—Dja ga prīne arkum 'ã karõ gê ar kuman ak-abēnkôt ar amijo ba. Dja ga Akarõo prīne ar no bô, Akarõo ar no bô gê ar prīne akukràdjã ma. Nã bãm ar ã kum ar ajo idjà'wýro ane.

¹⁰ Bir be, dja Metīndjwýnh prīne ar amã ar adjàpēnh'ã karõn ar ano bôn ar amã amikukràdjã jarē gar kam arým mã kôt amijo aba mextire gê Bēnjadjwýr ar akam kīnhkumrēx. Ga kam ar amã mýjja mexbit kīnh ne ar o aban ajte Metīndjwýnh maro tē:n amũ maro ajkamēn mar rax ne.

¹¹ Gêdja Metīndjwýnh prīne ar ajo tỳx. Djãm uma ngri got. Uma raxo kute mýjja kunī jakrenh. Ta tỳxo godja prīne ar ajo tỳx ne, ta mexo prīne ar ajo mex ne. Ga kam ar akràn mã amijo aba. Kwārīk wãnh gê te mýjja punu ar akam apôx nàr kon ar akaprī ar akam apôx gar mã Jejukôt ajkamēn tu akràn mã amijo aban angryk kêt ne tu akīnhkumrēx.

¹² Ne tu Jeju Bãmbê Metīndjwýnhmã amikīnh jarē.

Bir, mýkam? Bir, arým ne gwaj bajo mex. Gwaj bamex nhym kute õ me mextire jamē ro'ã gwaj bamã mýjja nhõrmã. Kute õ me jamã mýjja mextire djir ja tãm gêdja gwaj baro'ã gwaj bamã kungrã. Õ pykakam a'ubít, õ pykakam me axwe 'õ kêt, mýjja punu 'õ kêt tãm'ýr dja gwaj bôx nhym kute gwaj bamã mýjja ngrãnh ne kam ar kute gwaj bajo bamã. Kadjy ne gwaj bajo mex ne.

¹³ Be, arým ne mrãmri tu gwaj bapytàrkumrēx. Amrēbê ne Xatanaj ar gwaj bajo ba gwaj kam

bamã bajaxwebit kĩnh ne ar o baba nhym kam kute mrãmri akamàt kô tykkam kute ar gwaj bajo ba pyræk. Nhym arým Metĩndjwýnh kubê gwaj bapytà nhym arým wãnh ar ba. Arým tu Xatanajbê gwaj bapytàrkumrêx. Xatanaj kute àtykri ar gwaj bajo bajabê ne arým gwaj bapytà nhym Kra arým ar gwaj bajo ba. Bãm kum Kra kĩnhkumrêx ja ta ne arým ar gwaj bajo ba.

¹⁴ Nà, Bãm ta Xatanajbê gwaj bapa 'amỳ. Amrêbê Xatanaj ajbit ar gwaj bajo ba nhym kam Bãm kubê gwaj bapa 'amỳn gwaj bajo katon gwaj bajaxwe tu o aknon gwaj bajo ba. Kra tyk ne kamrô bikapĩnkôt ne Bãm gwaj bapytàn gwaj bajaxweo aknon tu mar kêt ne.

Kritu kute raxo katàt me kunĩ jakrenh.

Dju r 1.1; Kar 10.36; Kor 2.9; Idja 1.2

¹⁵ Nà, kra ta ne memã Bãmo amirĩt ne. Djãm me kute noo Metĩndjwýnh pumũnh got. Me kute noo omũnh kêt. Nhym kam kra ta memã Bãmbê Metĩndjwýnho amirĩt ne. Amê ar kute aben pyræk. Ar amê tãmỹ. Nhym kam kra ta memã Bãmo amirĩt ne. Ne kam ajte kubê Metĩndjwýnh Krakam ta ne õ mỳjja kunĩ djwýnh, mỳjja kunĩ nhõ bẽnjadjwỳr.

¹⁶ Ta ne kute mỳjja kunĩ 'yr djwýnh. Bãm kabẽnkôt ne mỳjja kunĩ 'y. Kàjkwamê pykakam mỳjja ja kunĩ 'y. Mỳjja me kute noo omũnhjamê mỳjja me kute noo omũnh kêtjamê, tãm ne kunĩ 'y. Me karõ nhõ bẽnjadjwỳrmê kadjy mrãnh djwýnh nhõ bẽnjadjwỳrmê mebêngôkre* nhõ bẽnjadjwỳr

* **1:16** Apýnh me õ pyka djari kunĩkôt ne me kunĩ bêngôkre. Kubêkà jakamê me kakrãtykmê me babêngôkremê ne me kunĩ: bêngôkre.

rũnhmẽ bẽnjadjwỳr krymẽ mỳjja kunĩ ne amim ipêx ne. Bãm kabẽnkôt amim ku'y. Nãm pũne amim mỳjja kunĩ 'y, pũne o atom, kam ne õ mỳjja kunĩ djwỳnh, ta õ mỳjja djwỳnh.

¹⁷ Adjàkam, mỳjja kator kêttri ne Jeju ar tĩn ne ba. Djãm pykabê mỳjja ta ar ba? Kati, ta ne kute mỳjjao ba djwỳnh ne kam kute mỳjja 'õ kanga kêtikumrêx. Kute mỳjja kunĩ 'yrkam ne kute mỳjja 'õ kanga kêt. Kra ta ne ar mỳjjao ba. Nym mrãmri mỳjja tu kunĩ rã'ã: rã'ã.

¹⁸ Nym ajte Krabê Jeju ta ne õ me ja kadjy bẽnjadjwỳr. Me kute amim Jeju mar ne kôt amijo baja me tãm ne me kute Jeju nhĩ pyræk. Nym bep Jeju ne kute krã pyræk. Jeju ne kam õ me ja kadjy bẽnjadjwỳr. Ta ne kutewa ne kam amikôt mỳjja kunĩ apôxo tẽ. Ne kubê Metĩndjwỳnh krakam kumrêx me tyk kurũm tĩn ne kato. Kam ne ajbit pydji raxo kute mỳjja kunĩ jakrenh, raxo mỳjja kunĩmã wa.

¹⁹ Kubê Metĩndjwỳnh djwỳnhĩ. Apỹnh Ar kubê Metĩndjwỳnh djwỳnhĩ. Kra kubê Metĩndjwỳnh djwỳnhkumrêx. Metĩndjwỳnh ne Kramẽ kute aben pyræk'ã amim karõ nym kam Kradjwỳ kubê Metĩndjwỳnh djwỳnhĩ. Ar amẽ kubê Metĩndjwỳnh djwỳnhĩ.

²⁰ Bir be, Metĩndjwỳnh ta ne amim Kra'ã karõ, krakôt kute amim mỳjja kunĩ õbikwamã, pykakam mỳjja nãr kãkwakam mỳjja, kunĩ kute o õbikwamã. Mỳjkôt? Krakôt, kra ne me kadjy pĩte'ykam tyn kamrô ajkapĩ nym kam kôt Bãm memã kabẽn mex jarẽ nym me arỳm umar mexbit ma.

Metĩndjwỳnh kute meo õbikwa.

21 Amrêbê ne gar Metĩndjwỳnh akurê djwỳnh. Ar aje ajaxwekôtbit ajamak bẽn ne aje mỳjja jaxwebit ar o abakam ne gar o akurê djwỳnh.

22 Nhym bep ajbir ne Metĩndjwỳnh ar ajo õbikwa. Nã gãm ar te amã kurê nhym Metĩndjwỳnh tu ar ajo õbikwakumrêx. Kra ne me kadjy amijo kubêngôkren ruwn kam ty. Nhym kam kôt Metĩndjwỳnh ar ajo õbikwakumrêx. Mỳj kadjy ne ar ajo õbikwa? Bir, kute amiwỳr ar ajo bôx, gar kabem aku'êmã. Ar mrãmri Metĩndjwỳnh mexo amextire ne ajmã akute kêt ne ar aba ne ar akam mỳjja punu 'õ kêtumrêx ne kabem aku'êmã. Kadjy ne Metĩndjwỳnh ar ajo õbikwa, godja gar arek o tẽn kanga kêt jabej.

23 Godja gar arek aje Jeju 'ã angràn mrãmri adjãm tỳx ne aje kanga kêt jabej ne kam ajte amijã kamnhĩxbê kam amak ar o aban kanga kêt jabej. Nã gãm ar arỳm Jeju'ã ujarênh nyja man kam amim kamnhĩx ne kam kam ama. Godja gar mrãmri arek kôt amijo atêm rã'ã ne aje kanga kêt jabej ne kam mrãmri arỳm 'ỳr bôx. Djãm ar gajbit ne gar Jeju'ã ujarênh ma? Kati, pyka kunĩkôt ne Jeju'ã ujarênh mekôt ajmã. Ba ibê Paur ne ba memã Jeju kukràdjà ny'ã idjujarênh mō. Idjàpênh ne ja. Kam ne ba kàjbê memã 'ã idjujarênh mō.

Paur me kadjy àpênh.

24 'Ã idjujarênh mō nhym me arỳm kôt ijo ajkê ba itokry ne. Djãm kôt ikaprĩ? Arkati, ikĩnhkumrêx. Me akadjy ne ba itokry ne kam ikĩnh ne. Mete Krituo bikênh nhym tokryja 'ã ne me ijakre. Ba kam ba itokrykôt mete inhĩo bikênh ba, ba itokryjakôt ne ba Kritu tokry nhinomã rênho tẽ. Jeju

nhĩ kadjy, mete amim Jeju mar ne kute Jeju nhĩ pyrækja, me kadjy ne ba itokryja.

²⁵ Ne me akadjy idjapênhja. Metĩndjwýnh ne me akadjy idjan imã idjapênh jarê. Ba kam me amã idjapênh ar iba. Mýj idjapênh nã? Bir, ije me kunĩmã prĩne Metĩndjwýnh kabên'a idjujarênh itêm nhym me kunĩ kute marmã.

²⁶ Amrêbê ne me kunĩbê Kritu apdju ne. Nãm me bakukãmãre amikam kra jadjwýro tēm tãmtã: nhym bipdjur rã'ã. Nhym kam ajbir Metĩndjwýnh arým memã o amirĩt, ta õ me mextire jamãbit o amirĩt ne. Kute amim me ja'ã karökõt ne memãbit o amirĩt ne.

²⁷ Amrêbê ne amim 'ã karõ ne kam me bê udju: ne. Ne arým jakam memã o kato, õ me mextire jamãbit ne o amirĩt ne. Mýj ne mekbê udju ne ajbir memã o amirĩt ne? Bir, Kritu me bakadjwýnhbê ýrja. Tãm ne gu me õ mýjja mex'ã amim kamnhĩx ne. Kritu me bakadjwýnhbê ýrkam ne myt kunĩkõt mã me bamã mýjja mex ngã ba me ikĩnhkumrêx. Mã ne mýjja mexja kute? Bir, mýjja mex ja ne apêx prãm kêtumrêx. Mýjja mex ja ne mexo kute mýjja kunĩ jakrenh, kute me kute õ nêkrêxo amimexja kunĩ jakrenh mex ne. Dja mã amirĩt rã'ã ne. Djãm me kwýmã ne o amirĩt ne? Kati, pyka kunĩkõt ne õ me jamã o amirĩt ne.

²⁸ Bir be, kam ne bar mã me kunĩmã Kritu'ã ajarê. Ar ikrã mexkõt, ar ikabên mexo ne bar me kunĩmã tĩn jangijn me kunĩmã Metĩndjwýnh kabên jarê. Ar ije Metĩndjwýnhmã meo imõr ne kum me õrmã. Me kunĩ arým kute Kritu mar mex ne kute inomã mênh, me tãm ne bar ije Metĩndjwýnhmã meo imõr ne kum me õrmã.

²⁹ Kadjy ne ba idjâpênhkam ityk djà kêt ne. Djãm Kritu rerek got. Axwe tỳx ne ta tỳxo ijo tỳ:x ba kam me kadjy idjâpênh ra:x ne.

2

Kritu ajbit rax nhym me kute ja mar kadjy ne Paur djâpênh raxja.

¹ Ë, ba ar amã arẽ, gar ama. Gora ar amã idjâpênh raxjakôt ima. Krĩraxbê Raodjikam ar jamẽ apỹnh krĩ rũnh djari me jamẽ me aje te ipumũnh kêt ba akrànMã ar me akunĩmã idjâpênh ibaja pumũ.

² Mỳj kadjy ne idjâpênh raxja? Ije ar amã tỳx jangjênh gar ajte atỳxmã. Ne ajte ar amã aben jabên axikôt akabên ne ar abamã. Ga kam ar aje mrãmri Kritu markumrẽxmã, Metĩndjwỳnh kute prĩne mekbê o bipdjurja ar aje mar ne aje katàt kôt mar ar o abamã. Mỳj ne mekbê o apdju? Kritu. Kritu mekbê bipdjur ne gar aje marmã. Me kute Kritu mar rax ne kute mrãmri me ò nêkrêx rũnh pyræk. Dja gar ã Kritu mar rũnho ane. Kadjy ne idjâpênh raxja.

³ Nà, Kritu pydji ne kute amikadjy memã no mex jangjênh djwỳnh. Ajbit kute memã Bãmmẽ ar kukràdjào amirĩt, kukràdjà bipdjurjao amirĩt nhym kôt me arỳm ò mỳjja mex maro tẽ, ò mỳjja mex maro tẽn kam kôt no mex. Nhym kam apỹnh me kute Metĩndjwỳnh nhõ mỳjja mar djari mrãmri kute ò nêkrêx mextire ja pyræk. Be, ga Kritu pydji kute amikadjy memã no mex jangjênh nhym me no mex ne kute ò mỳjja marja pumũ.

⁴ Atemã 'õ kêt. Ta pydji ne kute Bãmo amirît. Ê, me'õ kute ar anoo biknor karõ ne ba ar amã katàt 'ã ajarẽ. Me 'êx ne kute kabẽn punuo amikabẽn mex ne o kute ar anoo biknor karõ ne ba ar amã ane.

⁵ Nãm te jãnh prãme ba amybỳmbit imã ar akĩnh ne ar amar rã'ã. Arỳm ne ba ar aman kam ikĩnhkumrẽx ne. Nã gãm ar amim Kritu markumrẽx ne 'ã angrà tỳx ne amã me uma kêt ne kanga kêtumrẽx ne 'ãno dja, ne akrãnmã aben mẽ ar aba. Ba kuman kam ikĩnhkumrẽx ne.

Ar kute Kritubit mar kadjy.

⁶ Bir be, ar aje Kritu Jejuo anhõ Bẽnjadjwỳrkam ã kôt amijo abao ane, anhõ Bẽnjadjwỳr Jejukôt ã amijo abao ane.

⁷ Dja gar ã amũ Kritu maro abikamẽnho atẽm kute mrãmri ne pĩ abatành kadjy kute pykamã arê ngjẽn ne kute pyka 'amỳnh tỳxja pyràk. Dja gar ã amũ Kritu maro abikamẽnho atẽmo ane, ne ã Kritu 'amỳnh tỳx ne 'ãno adjãmo ane. Ne amrêbê ar aje amim Kritu marja arek o tẽ. Me kute ar amã arẽnkhôt dja gar arek o anhỹro tẽ. Dja gar ã o anhỹro atẽm rã'ãn prĩne mar tỳx ne. Ne kam Metĩndjwỳnhmã amikĩnh jarẽ, ne kum amikĩnh jarẽn 'ãno dja.

⁸ Dja gar aminêje me kabẽn punuwã pumũ. Dja me kabẽn punu 'êx ne amijo kabẽn mex ne mõn ar anoo akno. Djãm me kabẽn punuja kabẽn katàt got, kabẽn mex got? Kati, me kabẽn kajgo mexi. Me ta ne me ar abenmã 'êx ban amũ abenmã arẽnho mõi tãmtã nhym ì kamin-grãny amũ abenmã arẽnho mõi. Djãm Metĩndjwỳnh kabẽnkôt ne wã? Kati, me ta kukràdjàkôt ne me

kabên kajgowã. Nhyim bep atemã ne Kritu kabên katatà. Mrãmri katat arê.

⁹ Kubê Metĩndjwỳnh djwỳnhkumrêx. Amijo kubêngôkren me bawỳr pykamã ruw. Kubêngôkrekam ne kubê Metĩndjwỳnhkumrêx. ãm Metĩndjwỳnh djwỳnhĩ. Ta ne kubê Kritu.

¹⁰ Ne ta gwaj bakadjwỳnhbê nhỳn gwaj bamã umar mexti:re jarê. Gwaj bamã umar mextire jarê gwaj kam bakĩnhkumrêx. Mã ne gwaj bakĩnh kute? Bir, mrãmri me kute õ nêkrêx rũ:nhkam kĩnhja pyræk. Dja gwaj Jejukam bakĩho bamã nêkrêx kĩnhja jakrenh mex ne. Ê, mrãmri ne Kritu raxo kute me bẽnjadjwỳr rũnhmê me bẽnjadjwỳr kry kute meo baja kunĩ jakrenh. Ta ne umar mexo ar gwaj bajo ban gwaj bajo kĩho ba, gwaj bamã kĩnh jangjêho ba.

¹¹ Arỳm gwaj baje Krituo aminhõkam ne gwaj atemã bakukràdjà. Gwaj bakukràdjà tũm, gwaj bajaxweja ne gwaj arỳm tu wãnh kangan kum banhire. Ne kam gwaj bamex kute mrãmri ne mekbê idjaer kute me my nhinhu kà rênh nhyim me kam mex ne kĩnhja pyræk. Me bajtem kute Metĩndjwỳnh nhõ me ja mar kadjy ne me me my nhinhu kà rê. Nãm me me my nhinhu kà rên mũm kurên kam kĩnh nhyim Kritudjwỳ arỳm gwaj bamã gwaj bakukràdjà tũmja mũm ã rênho ane gwaj kam ã badjwỳ ã bamexo ane nhyim Metĩndjwỳnh arỳm gwaj bakam kĩnh ne.

¹² Jeju akubyn tĩn ne me tyk krã kurũm ka-tor'ã ne ngônhmã gwaj bajangjênhja amijakre. Ngônhmã gwaj bajangjênh ne kute Jeju tyk ne pykakam ir pyræk. Nãm me ã ngônhmã gwaj

bajangjêho ane. Ngônhmã gwaj bakrã jangjênh, gwaj kam akubyn bakrã apôx ne kute Jeju kênkre kurũm akubyn tĩn ne kator pyræk. Metĩndjwỳnh ta ne tỳxo akubyn Krituo tĩn, me tyk kurũm Krituo kato. Gwaj kam arỳm tu amim kamnhĩxkumrêx nhym kam ngô kurũm me bakator kute gwaj badjwỳ akubyn batĩn pyræk, kute ta tỳxo Kritumẽ ro'ã gwaj bajo tĩn pyræk. Kam dja gwaj bakukràdjà nykôtbít amijo baba.

¹³ Bir be, amrêbê ne gwaj baje batyk pyræk ne ar baba. Nã gwaj bajaxwekumrêx ne mũm amikukràdjà tũm rênh kêtka kute me batyk pyræk. Nhym bep ajbir ne Metĩndjwỳnh gwaj bajaxwe kunĩo biknorkumrêx. Nhym kam kute Kritumẽ ro'ã gwaj bajo tĩn pyræk.

¹⁴ Arỳm ne Metĩndjwỳnh Môjdjê kukràdjào apêx. Môjdjê kute memã “Kwãrĩk wãnh” anhỹr ne 'ã pi'ôk no'ôkja arỳm o apêx. Nã gwaj te kukràdjækôt amijo babamãn ãm mã bajamakkre kêt. Nhym kam Metĩndjwỳnh ôkre kadjwỳnhbê,

—Ikra tykkôt, mete pĩte'ykam kum o i'êk nhym tykkôt dja me tu amim ikamnhĩxkumrêx ba kam me'ã mex rê. Nãm me te Môjdjê kukràdjækôt te o anen mar kêtka kumrêx ne, ane. Nãm ã Metĩndjwỳnh o anen ã Môjdjê kukràdjào apêxo ane.

¹⁵ Be, Kritu tykkôt ne Metĩndjwỳnh me karõ punu rũnhjadjwỳo ajkê, me karõ punu nhõ bẽnjadjwỳrmẽ, me tãm ne Metĩndjwỳnh meo ajkê. Nãm me amipardja'ã me pa 'amỳn kam meo kurwỳko ban meo bôx. Me ipôkri ne me meo kurwỳko ban meo bôx ne kam pĩne mekbê àbêr djà kunĩo apdjun kam memã me uma ngrành mex ne. Nhym me kunĩ

kôt omũn arým kôt kuma. Nãm ã Kritu tykkôt ã Metĩndjwýnh me karõ punu rũho bikẽho ane.

16 Metĩndjwýnh kute me karõ punu rũho bikẽnhkam kwãrĩk wãnh õ kukràdjã mar kêt. Nãm me Môdjê kukràdjã kupa'ã mekbê mýjja puma ar o ba ne memã amijangri'ã apnê. Bir be, kukràdjã kakritja dja gar mar kêt. Metĩndjwýnh arým kute mýjja tũmjao apêxkam dja gar mar kêt. Kwãrĩk wãnh ga arĩk ar adjàkur abakam gê me'õ adjàkur mýr jabej ar amã kabẽn 'õ jarẽnh kêt, nàr kon, mýjjao akõm mýr jabej gê me'õ ar amã kabẽn 'õ jarẽnh kêt. Nàr kon, me rer mex 'õkam, mytyrwý 'õkam, akati 'õkam, me rer mexo mõrkam, mekôt ar aje amijo anhýr kêtka, kwãrĩk wãnh gê me kam ar amã kabẽn 'õ jarẽnh kêt. Kwãrĩk wãnh mýjja kukràdjã ja mýr jabej gê me'õ ar amã àkrê kêt.

17 Kritu bõx kêttri ne me kukràdjã ja arĩk kam ar ba. Nãm me Kritu kutêp ar kukràdjã jabito ba. Kajmã'ã ari o ba nhym kam bõx ne arým o ajngra, kukràdjã tũmja tu mũm kumê.

18 Kwãrĩk wãnh me 'êx ne kute amijo pijãm ne arĩk Metĩndjwýnh kadjy mrãnh djwýnhmã kabẽnja wãnh nõ. Nãm me kum mýjja ja kĩnh ne 'ã ar amã apnê, ar aje me kudjwamã. Nãm we me,

—Dja gar me ikudjwa kadjy mrãnh djwýnhmã amijarẽn kum rax jarẽ nhym arým Metĩndjwýnh kum ar akĩnh. Dja ga ar o anhýr kêt nhym arým kum ar akĩnh kêt. Djãm abẽnjadjwýr got ga tu Metĩndjwýnhmã akabẽn, ane. Kati, nãm me 'êx. Kwãrĩk wãnh wãm nõ gê me ja ar anoo biknor kêt.

Nãm we me biptirkam mýjja pytiro ikwãn we ar amã kôt 'ã ujarẽnh ba. Kati, nãm me 'êx. Me ja ne me kajgo mex ne kam we ar amã mýjja jarẽho ban

we amijo àmra ba. Kati, nãm arĩk ar ta amijo 'êx ne amijaxwekôt amiman kam we amijo àmra ba. Kati, nãm me 'êx.

¹⁹ Ne arỳm Kretimã iren 'amỳnh kêt.

Kritubê Metĩndjwỳnh djwỳnhkumrêx. Ta ne wỳnhĩ. Kute ta krã pyràk. Me baje Kritu mar ne gu me baje ã pyràk. Nhyim bep Kritu ta ne kute krã pyràk nhyim me kum iren 'amỳnh kêt. Nã gu me bakukràdjari ajkanhõk ne kam tu batypydji. Apỳnh kêtê. Me bakukràdjãmê me bakudjêk kunõ aben pydjim me bakrãmã kumê.

Nãm ã Kritu ta kubê krãkam ta ão djuw mexo tẽ, me bajo djuw mexo tẽmo ane. Kritu ne ta õ me jamã bẽnjadjwỳr ne kam amim meo atom ne meo djuw mex. Te apỳnh me ba djari baba nhyim tu amim me bajo atom, me bajo aben pydji gu me batypydjim aben mẽ ar baban kam kôt bamã aben jabên kam baro'ã Kritu maro tẽ. Metĩndjwỳnh ne amim me bajã karõ gu me kam kàjmã kôt ã maro batẽmo ane.

²⁰ Arỳm ne gar Kretimẽ ro'ã ty nhyim arỳm ar amã mỳjja kukràdjà kakritja mũm kumê. Kritu kute ar amã mỳjjao apêx gar kam mã ajte amã akukràdjà kakrit kĩnh. Mỳkam ne gar akubyn mã amã pyka jakam me kukràdjà jabit kĩnh ne kôt ar amijo aba? Nãm we me,

²¹ —Kwãrĩk wãnh byr kêt,

—Kwãrĩk wãnh kakinh kêt,

—Kwãrĩk wãnh kupênh kêt, ã we anhỳr ar ba gar kôt amijo aba.

²² Djãm Metĩndjwỳnh kukràdjà ne ja ne me we ar “Kwãrĩk wãnh” ar o ban mekbê mỳjja puma ar o ba? Kati, me ne me ane. Kukràdjà tũm,

kukràdjà kakritja arým kêt. Metĩndjwýnh arým kukràdjà tũmjao apêx gu me arým kôt amijo baba kêt. Mrãmri kute me badjàkur djà pyràk. Tebê dja me batikkrekam apêx ne me banhĩ'ã apêx ne me bakràkà'ã mrã. Nãm ã kukràdjà kakrit, kukràdjà tũmja apêxo ane.

²³ Me kute mebê mýjja pymaja ne me 'êx ne kabên mex ne. Bep kati, nãm me tu ar mýjjamã amijarênho ba, mýjjao Metĩndjwýnh ne ar kum amijarênho ban 'ã memã apnê nhym me kudjwa. Nãm we me 'êx ne we ar amijo pijàmo ban ar ta aminhĩ djwýnho bikênho ba. Me ta kute we amibê axwe rênhmã prĩne amijo bikênho ba. Metĩndjwýnh kute memã ja jarênh kêt. Me ta ne me arĩk ta kute amijaxwe bĩnmã apýnh amijo ba djari amijo ba. Nãm me amititik ne kam amijo bikênh mexo ba. Kati, ãm kajgo mexi. Nãm me te aminhĩ djwýnhja te o ane nhym ãm mã axwe. Djã nãm me amibê axwe kurê? Kati, nãm me te o anen mã axwe.

3

Ar kute katàt amijo bamã arkum 'ã karõ.

¹ Gora ar Kritumẽ ro'ã arým akubyn atĩnkam, ngô kurũm ar ajapôx kute akubyn atĩn pyràk, kam dja gar kàjkwakambit mýjja jabej ajkam ama. Kam ne Kritu nhỹ, Metĩndjwýnh djubók'ãnh nhỹ.

² Dja gar kàjkwakam mýjjakôtbit ajamak bën. Kwãrĩk wãnh pykakam mýjja mar kêt.

³ Kute Kritumẽ ro'ã arým atyk pyràk. Djãm me tykkam kute pyka jakam mýjja mar got. Bir be, arým Kritumẽ ro'ã ar atyk ne ro'ã akubyn atĩnkam, dja gar jakam, pyka jakam, Kritumẽ atypydjin ari

ar aba. Nhyam kam Kritu kadjwỳnhbê, Metĩndjwỳnh ar ajo bipdjur mex ne, kute apytàr mex kadjy. Kam dja gar kàjkwakam mỳjjabit ma.

⁴ Be, Kritumê ne gar atypydjin ar aban kam tu atĩnkumrêx ne. Gêdja Kritu akubyn raxo amirĩt ne kam abêngôkredjwỳ* arỳm araxo amirĩt.

⁵ Bir be, kam dja gar arĩk abawā tu krā'yrumrêx gê on wānh nō. Kwārĩk wānh gar krô'ā aprō kêt, nhyam me nijadjwỳ krô'ā mjên kêt. Ar aprō prām, nhyam me ni mjên prāmja kwārĩk wānh nō. Gê me my prō prām ne kurê ar ba, nhyam me ni ar mjên prām ne kurê ba kwārĩk wānh nō. Me kum mỳjja punubit prāmja kwārĩk wānh nō. Ne me kum nêkrêxbit prāmja kwārĩk wānh nō. Nām me kum nêkrêxbit kĩnh ne kam kôtbít amak bēn ne kam kum Metĩndjwỳnhja mar prām kêtumrêx. Me kute mỳjjao Metĩndjwỳnh karō nhípêx ne kute we kum ar amijarēho baja tām ne Metĩndjwỳnh kum kĩnh kêtumrêx. Nhyam me kum nêkrêxbit prāmjadjwỳ kum kĩnh kêtumrêx. Amê punu nhyam kam kum kĩnh kêtō aben pyrāk ne. Kam ne ba ar amā,

—Tām gêdja on wānh nō, ane.

⁶ Mỳjja ja kunĩkôt ne Metĩndjwỳnh mekam ngry:k ne. Godja me kute mỳjja jao ban kam kute Metĩndjwỳnhkôt amijo ba kêtumrêxja, me tām gêdja Metĩndjwỳnh mekam ngryk ne ĩ memā o pānh.

⁷ Nhyam bep amrêbê ne gar gadjwỳ ā amijo aba punuo anen ajbit ma.

⁸ Bep jakam dja gar on mỳjja ja kunĩ kanga. Kwārĩk wānh gar angryk kêt ne memā adjàkjêr kêt

* **3:4** Apỳnh me ō pyka djari kunĩkôt ne me kunĩ bêngôkre. Kubêkà jakamê me kakrātykmê me babêngôkremê ne me kunĩ: bêngôkre.

ne aje amipānhmã mar kêt ne me kàmex jarēnh kêt ne ajajkwakam akabēn punu 'õ jarēnh kêt. Me my kute me nire kukràdjà'ã me aprÿja dja kêt. Nhy m me niredjwÿ kute me my kukràdjà'ã me aprÿjadjwÿ dja kêt kumrēx.

9-10 Kwārīk wānh gar akukràdjà tūm jakôt abenmã ajēxnhī kêt. Arÿm ne gar akukràdjà tūmja mūm kunī mē. Ar aje akukràdjà tūmkôt aje abenmã ajēx aba ja ne gar arÿm nhī'ām kunī mē. Pānh ne gar akukràdjà nykôt mÿjja mexbit ma. Metīndjwÿnh kute ar ajo ny nhipēx djwÿnh ne ar ajo nyo tē, ar aje Metīndjwÿnh mex pyrāk kadjy ne ar ajo nyo tē, prīne ar aje Metīndjwÿnh markumrēxmã ne ar ajo nyo tē.

11 Metīndjwÿnh kute meo nykam ne me arÿm abenmã kre rax kêt ne tu arÿm abenã tÿm ne typydji. Arÿm Kritukôt me apÿnh ba djari kute abeno kurē djwÿnh kêtē ne kam arÿm tu abeno kamyn abeno òbikwa. Me bajtemmē mebē idjaermē, me tām ne Metīndjwÿnh arÿm meo aben pydji. Ne ajte me my nhinhu kà rēnhmē me mykà tāmē, me tām ne Metīndjwÿnh ajte meo aben pydji. Me kute arÿm me krōrmē me krōr kêt apÿnh ò pykakam ba djari bajamē, me tām ne Metīndjwÿnh arÿm meo aben pydji. Me kute me pa 'amÿnh nhy m me memã àpēnh kajgo ar bajamē me kute memã o pānh kadjy àpēnhjamē, me tām ne arÿm Metīndjwÿnh meo aben pydji. Nà, ne arÿm memã me kute abeno kurē djwÿnhja arÿm o ajngrà. Kritukôt ne me aben pydji ne kam kute Kritubit mar, arÿm ajbit kute amikajmātã mar. Djã nām kum me'õ kīnh kêt ne? Kati, nām kum me kunī kīnh ne me 'ãno dja. Nām

me 'ãno ãmo aben pyræk ne.

¹² Ga Metĩndjwỳnh kute amijo ar apytàr ne arỳm kute amim ar ajo bikjêr ne kam kute ar ajo mex ne kum ar ajabêkumrêxja pumũ. Kam gêdja gar tu amim akukràdjà ny man kôt amijo aba. Gora ar amã me kaprĩ ne adjukaprĩ ne ar meo aba. Kwãrĩk wãnh ar ajõ apydji arax prãme ari aba kêt. Dja gar memã aprĩ mex ne ar meo aba. Tu akabôt katin akrànãmã ar meo aba. Be, mỳjja mex ja dja gar ã maro anen kam tu kôt amijo aba.

¹³ Gêdja me'õ ari kute anoknoro ba jabej kwãrĩk wãnh ga kum adjàkrê kêt ne mã kum akabên mex jarê. Dja gar ã anen ar abeno aba. Dja gar abenkam amikrà rax jabej nàr kon amikrà ngri jabej tu o aknon abenkam angryk kêt. Gar Bēnjadjwỳr djwỳnh arỳm ar aje kam amikràja tu o biknorkumrêx ne ar akam ngryk kêtja pumũ. Dja gar ã anen ar aje abenkam amikràja tu o abiknorkumrêx ne abenkam angryk kêt.

¹⁴ Gora ar mỳjja ja kunĩkôt amijo aban kam ajte iby amã aben jabê. Gora ikabên ja ma. Ar amã aben jabên ar abeno aba. Ar atypydji djà ne ja. Ar amã aben jabên kam atypydjin kam amexkumrêx.

¹⁵ Djãm ar aje abeno ajtemmã ne Metĩndjwỳnh amiwỳr ar ajuw? Kati, gar atypydjin aben kam adjumar mex kadjy ne amiwỳr ar ajuw. Bir be, kam dja gar adjumar mexbit ma. Kritu ta umar mextire jao dja ar amã umar mextire jadjà ne o aben nêje me akukrà. Dja ta õ me umar mex djào prĩne ar ajaên kam o aben nêje ar ajakre. Ë, gora ar Metĩndjwỳnhmã amikĩnh jarê.

¹⁶ Gora ar prĩne ajamakkrekam Kritu kabên

kunĩ nhôn kôt ar amijo aba. Ne akabên mexo abenmã Metĩndjwýnh kukràdjà jarèn o abenmã tĩn jadjà. Ne Metĩndjwýnh'ã angrer aba. Mebê idjaer nhõ me ngrer tũm jarèn kam ajte Metĩndjwýnh Karõ kute ar amã me ngrer ny jarènhjadjwý jarẽ. Ne Metĩndjwýnhmã ar amikĩnh jarẽ, angrerkôt kum akadjwýnhbê akĩnh jarẽ.

17 Dja gar Bẽnjadjwýr Jejukôt amijo aban Jeju Bãmbê Metĩndjwýnhmã amikĩnh jarẽ. Djãm ar akàtàm, djãm ar anhõ bẽnjadjwýr kêt dja gar adjàpênh punun akabên punu? Kati, ar abê Bẽnjadjwýr Jeju nhõ àpênhkam dja gar adjàpênh mexkumrêx ne akabên mex ne. Ar abê Bẽnjadjwýr Jeju nhõ àpênhkam dja gar anhõ bẽnjadjwýrkôt amiman kôt akabên mexkumrêx ne kôt adjàpênh mexkumrêx ne mýjja kunĩkôt Jeju Bãmbê Metĩndjwýnhmã amikĩnh jarẽ. Kritukôt kum amikĩnh jarẽ.

18 Ë, ar apa, ar anire, arým ar amjênja dja gar amjên kabên man kôt amijo aba. Bẽnjadjwýr djwýnh kute ar amã ã anhýrkam dja gar ã amjên kabên mar ne kôt amijo abao ane nhym kam mexkumrêx ne.

19 Ë, ar apa, ar amy, ar amã aprõ jabên kum akabên djà jarènh kêt ne kum akabên mexbit jarẽ.

20 Ar apa, ar aprĩre, gora ar ar anãmê ar abãm ar kabên man ar kabênkôt amijo aba. Ar kute ar amã kabên jarènhjakôt amijo aba ne o abiknor kêt. Nhym kam Bẽnjadjwýr djwýnh ar akam kĩnhkumrêx ne.

21 Ë, ar apa, ar ajabatànha, kwãrĩk wãnh gar akra arkum akabên kêt ne arkum ngryk jadjàr kêt.

Arkum akabēn mexbit jarē. Dja gar arkum adjàkrê nhym ar arým kaprĩ ne katàt mrānhja kanga.

22 Ē, ar apa, memã ar adjàpēnh kajgo ar abawã, me kute ar ajo pānh ne amim ar apa 'amýnh gar memã adjàpēnh kajgo ar abawã gora ar pyka jakam ar apa 'amýnh djwýnhja kabēn ma. Kute mýjja ar amã arēnh kunĩkôt dja gar kabēn man kôt amijo aba. Djãm me kute ar apumũho ku'èkambit got gar memã adjàpēnh mex ne, nhym we me ar akam kĩnhmã? Kati, me kàxãdjwý dja gar tu adjàpēnh katàt ne. Ar amã Bēnjadjwýr Jeju kĩnh ne amã umakam dja gar tu kum adjàpēnh katàt ne.

23 Gora tu ar adjàpēnhkumrēx. Kwãrĩk wānh gar adjàpēnh punu kêt. Dja gar tu adjàpēnh kunĩ amã kĩnh ne kupēho tē. Ne tu adjàpēnh mexkumrēx ne katàt adjàpēnh tē. Djãm pykabê mebēngôkre 'ôbitmã ne gar apê? Kati, kãjkwa kam ar anhõ Bēnjadjwýrmã ne gar apê. Kam ne ba ar amã katàt ar adjàpēnh'ã karõ, ar aje katàt adjàpēnhwão atēmã ne ba ar amã adjàpēnh'ã karõ.

24 Gora ar ama. Bēnjadjwýr djwýnh ta dja ar amã o pānh. Kute õ me jamã mýjja mextire djirja dja ar amã kungã gar amim aby. Bir be, Bēnjadjwýr Kritumã ar adjàpēnhja man kam kôt kute ar apa 'amýnh djwýnhmã adjàpēnh ar aba.

25 Bep apýnh me axwe djari gêdja Metĩndjwýnh memã axwe pānh jarēho tē. Amrēbê tĩri axw-eri gêdja Metĩndjwýnh kôt kum o pānh ne, tĩri axwekam dja memã o pānh aben pyrãk ne. Djã nãm we,

—Ije bep tãmja ne õbikwa krãptĩ ne kam bēnjadjwýr rax. Kwãrĩk wānh kum pānh jarēnh

kêt. Ba 'uwtĩjamã pãnh jarẽ, anhỹr got? Kati, nãm tu memã pãnh jarẽho aben pyrãk ne. Ne me axwekam katãt memã o pãnh.

4

Me bẽnjadjwỳr kute õ àpẽnho ba katãtmã.

¹ Ë, ar apa, ar aje meo pãnh ne amim me pa 'amýnh nhym me ar amã àpẽn kajgo ar bawã, ar amã ne ba ikabẽn. Gora ar anhõ àpẽnhmã akabẽn mex jarẽn meo aba katãt. Ë, ar gadjwỳ ne gar kàjkwakam anhõ Bẽnjadjwỳr. Gora ar ama. Tãm ne ja.

² Ë, ar apa, gora ar akupãnhntã Metĩndjwỳnhmã akabẽn 'ãno dja. Gora ar Metĩndjwỳnhmã ami-jarẽnhkam amã adjukanga kêt ne aje kum ami-jarẽn ar o abakõt aje mỳjja'ã 'wỳrja tãm dja gar kam ama. Ne kum ar akabẽnkõt kum amikĩnhdjwỳ jarẽn 'ãno dja.

³ Kum ar akabẽnkõt ar badjwỳ kum ar ijo a'wỳ gẽ Metĩndjwỳnh mỳjja kute ar ibê àptàrjao ajngrã bar tu memã Metĩndjwỳnh kabẽn jarẽ, memã Kritu jarẽ. Nãm mekbê apdju bar kam ije memã o amirĩtmã. Kam ne ba mekbê ijê djakam idjãmja. Nã bãm ije memã Kritu jarẽnho itẽm katikõt nhym me mekbê ijê djakam imẽ.

⁴ Bir be, kam gẽdja gar kum ijo a'wỳ, ije memã arẽn ne ije katãt memã o amirĩtmã. Ije Jeju mekbê bipdjurja memã arẽn ne ije memã mã o amirĩt nhym me kute katãt marmã. Nã, kadjy ne Metĩndjwỳnh amim idja, ije prĩne memã o amirĩtmã. Tãm ne ja.

⁵ Be, me kàtàm kadjy, me kute Jeju mar kêtja, kadjy dja gar akrànãmã amijo aba mextire ne memã akabên mexbit jarê. Gêdja aje Jeju'ã adjujarênh djà awÿr bôx ga kam mekmã Jeju jarê.

⁶ Gora akrànãmã memã adjujarênh akri gê me ar amã,

—E kum goja ajte adjujarênh nhÿ. Ga nã gãm akabên mar prãmre, ane. Gêdja me kute mÿjja 'õ mar prãm jabej akukij ga kam memã katàt 'ã adjujarênh nhÿ. Be, tãm ne ja.

Apÿnh õbikwamã kute kabên janor.

⁷ Ota me bakamy Xikiku dja ar amã prïne ijarê. Gwaj bamã Xikiku jabêkumrêx tãm dja ar amã ijarê. Nà, nãm ikôt àpênh mexkumrêx ne àpênh kanga kêtumrêx. Bënjadjwÿr nhõ àpênhkumrêx ne ja. Nãm ar ikôt kum àpênh ar ba. Ta dja prïne ar amã ijarê.

⁸ Kadjy dja ba ar awÿr ano, kute ar amã ar ijarênh gar aje ar imar nhym kute ar amã kïnh jadjàr gar ajte atÿx ne akïnhmã. Kadjy dja ba ar awÿr ano.

⁹ Gwaj bakamy Ônemudjwÿ dja ba ano, wãm ar ro'ã ar ano. Gwaj bamã Ônemu jabêkumrêx, tãm dja ba ano. Nãm amim Kritu markumrêx ne kanga kêt. Ar ajõ 'õ. Be, ar ta dja ar ar amã jakam mÿjja kunï jarê.

¹⁰ Gwaj bakamy Arxakumê ar iro'ã mekbê ijê djàkam dja. Ne ar ajo aman wãm ar amã amijarê. Nhym Makudjwÿ kubê Banabe tàmdjwÿja adjwÿnhdjwÿ ar ajo aman wãm ar amã amijarê. Ê, arÿm ne ba ar amã 'ã karõ. Dja ar awÿr tèn bôx gar amiwÿr o wadjàn kum akabên mex jarê.

11 Jejuw, mete kum Juxu jarēnhja adjwýnhdjwý ar ajo aman wām ar amā amijarē. Be, Arxakumē Makumē Jejuw ar ajbit ne Ar kubê idjaer ne kute amim Jeju mar ne ar ikôt àpēnh ar ba. Ar kute mekmā Jeju jarēnh nhym me kute amikajmātā Jeju mar nhym Metīndjwýnh kute ar meo bamā ne ar ikôt àpēnh ba. Nām ar ikôt àpēnh mexkumrēxo ikīnh ne.

12 Epapraj, ar ajō 'ō ne kubê Kritu Jeju nhō àpēnh ne ar ajo aman wām ar amā amijarē. Nām Metīndjwýnhmā ar ajo à'wýr 'āno dja. Tyk djā kēt ne ar ajo à'wýro ban kum,

—Ga dja ga aro tỳx gē ar ajā ngrā tỳx ne akanga kēt ne amar mex nhinomā kurē. Ga dja ga arkum 'ā karō gē ar kôt mrā, aje amim ar'ā karōkôt mrā. Nām ā kum ar ajo à'wýro ane.

13 Be, ba ne ba inoo Epapraj pumūn kôt ar amā 'ā pi'ôk no'ôk ne. Mrāmri ne ar ajā àpnhīx ne. Krīraxbê Raodjikam ar jamē krīraxbê Ijeporikam ar jamē me akunī'ā ne àpnhīx ne. Ba ne ba arým omūn ar amā 'ā pi'ôk no'ôk ne.

14 Rukabê me kane djwýnh gwaj bamā kīnhkumrēxjamē Temanhmē ar ar ajo aman wām ar amā amijarē.

15 Nā bām Raodjikam gwaj baje abeno bakamyo ama ne. Gora arkum ijarē. Nīpa nhūrkwākam ar kute Jejukôt aben pydjwāmē Nīpa bēngōkremē ne ba o ama ne. Ar wāmādjwý ijarē.

16 Ē, ije ar amā pi'ôk no'ôk nhōrwā gar omū:n omūnh pan kam amū krīraxbê Raodjikam ar kute Jejukôt aben pydjwāmā angā gē kam ar amipānh ar amā wā ngā. Dja ba ije wām ar amā pi'ôk no'ôk nhōrwā gar ga wā pumūn amū ar wāmā angā gē

Raodjikam ar wã amrẽ amipãnh ar amã wã ngã.
Gar aprakamã omũ.

¹⁷ Ë, Akipumã kum,

—Gora Bẽnjadwÿr kute amã adjàpênh jarênhja on
o tẽn inomã amẽ, ane.

¹⁸ Ba ibê Paur ne ba wãm ar amã ikabên ne.
Nhym bep ngrire ja ne ba ba inhikrao ipêx ne. Nã
bãm ar ajo aman kam wãm ar amã amijarẽ. Gora
mekbê ijê djàkam idjãmja man o abiknor kêt. Gê
Metĩndwÿnh ukaprĩkôt ar ajo djuw mex. Tãm ne
ja.

Metĩndjwỳnh Kute Memã Kabẽn Ny Jarẽnh
New Testament in Kayapó (BR:txu:Kayapó)

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kayapó

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

PDF generated using Haiola and XeLaTeX on 18 Apr 2025 from source files
dated 29 Jan 2022

385317df-3c6a-53ac-81db-0815750ed560